

Nos Antepasadonan...

Julian Christiaans

Julian "Janchi" Christiaans, Goy Semeleer, y otro metslá di Noord manera Hilario Christiaans, Victor Tromp, Gerardo Jacobs, Cornelis Rosa a duna casnan na Noord y Paradera e mes un adorno. Na 1927 Janchi a traha e cas di Julian Tromp na Boegoeroei. Esey tabata di prome cas na Noord cu a haya e floriamento na sistema di cortina, pero e cas ey no ta existi mas.

Mas despues metslanan di Paradera, Santa Cruz y Savaneta tambe a cuminsa cu floriamento di cas. Nan a practica e sistema ey mas of menos te na aña 1944. Actualmente nan tin e patroonchi wardá, pero nan no ta us'é mas.

Janchi Christiaans a cuminsa cu corta patroonchi di zink y carton. Ora cu nan a pone un bon pleister di kalki cu santo riba muraya nan tabata corta e figuranan, segun e patroonchi, cu un sambechi. Cu cuchara nan tabata coba e figuranan den e pleister cu tabata keda muhá pa basta ora pa motibo cu e kalki ta tene e awa. Despues nan ta blancha e cas cu su figuranan na dos color y e figuranan ta sali clá-clá.

Figura di cortina cu su kwashinan of di flor sensiyo y di dos pilar na skina di muraya tabata e sistema di Janchi. Pero na Pos Chikito fantasia di Leoncio y Bonifacio Henricus a tuma tur libertad pa traha tur sorto di figura manera p.e. pico di parha, mita luna, etc. Ta esey a haci e casnan di Pos Chikito y Sabana Basora asina remarkabel na Aruba. Na e otro partinan di Aruba nan no tabata gusta e sistema di Sabana Basora. Nan tabata haya e sistema di cortina, flor, y pilar mas serio y nechí.

Sinembargo e floriamento di cas no tabata un idea original di Janchi Christiaans, cu a traha tanto cas na Pos Chikito.

Janchi tabata un disipulo di su tata Jose Christiaans y di famia Donati. Famia Donati tambe tabata dorna cas, principalmente cu figura di cortina. Pero nan tabata haci esey sin patroonchi, simplemente na man. Tabata Alexander Donati kende a siña Janchi Christiaans.

Julian, Janchi, Baas, Buchi Jan o Papa Jan a nace y biba na Palm Beach 260 D2 y cu den añanan sesenta a bira Monserat 9. El a biba di 1876 te 1961. E tabata e bisanieto di Filipi Christiaans, cu nos ta conoce for di historia di Alto Vista.

E casita aki ta na Boegoeroei y tabata di Johan Roza cu ta un ruman di Cornelis Roza, kende tambe tabata traha cas cu figura di "cortina".

Sacá for di: Millefiori di Aruba pa R. H. Nooyen Foto: Sra. M. Roza-Christiaans



Esaki ta Julian "Janchi" Christiaans, metslá di Noord, hunto cu su señora.



Skina di
SABIDURIA

Mucha: Dicon bo ta limpia e antenanan riba bo cabes asina hopi?

Vruminga: Mi antenna-nan ta hopi importante pa'mi. Nan mester ta semper limpi, pasobra ta cu nan mi por mishi, purba, hole y tende. Si nan ta sushi mi por perde mi caminda.



Chabalito



Number 9 - Año IV
Mei, 2002 - Afl. 2,=



- 4 JUNI 2002